



SLUŽBA ZA REVIZIJU FINANSIRANJA POLITIČKIH STRANAKA

Na osnovi člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u vezi sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2010. GODINU I POSTIZBORNOG FINANSIJSKOG IZVJEŠTAJA – OPĆI IZBORI 2010. **NARODNE STRANKE RADOM ZA BOLJITAK**

Broj: 03-07-6-472/11
Sarajevo, 29. maj 2012. godine

SADRŽAJ

| | |
|---|---|
| MIŠLJENJE REVIZORA | 3 |
| 1. UVOD | 4 |
| 2. PREDSTAVLJANJE POLITIČKE STRANKE | 4 |
| 3. OPIS REVIZIJE | 5 |
| Predmet revizije..... | 5 |
| Cilj revizije..... | 5 |
| Obim revizije..... | 5 |
| 4. PRETHODNE REVIZIJE | 5 |
| 5. NALAZI I PREPORUKE | 6 |
| 5.1. NALAZI..... | 6 |
| 5.2. PREPORUKE | 9 |

MIŠLJENJE REVIZORA

Služba za reviziju finansiranja političkih stranaka izvršila je reviziju finansijskih izvještaja Narodne stranke Radom za boljitak i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Rukovodstvo stranke je odgovorno za finansijske izvještaje, postupanje u skladu sa Zakonom o finansiranju političkih stranaka i uspostavljanje efikasnog sistema internih kontrola.

Naša odgovornost je da izrazimo mišljenje na osnovi revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa Zakonom o finansiranju političkih stranaka.

Revizija je na osnovi uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Narodna stranka Radom za boljitak u izvještajnom periodu nije postupila u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Narodna stranka Radom za boljitak u 2010. godini postupala u skladu sa odredbama Zakona o finansiranju političkih stranaka, te da je troškove izborne kampanje finansirala u skladu sa odredbama člana 15.10 Izborno zakon Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskih izvještaja Narodne stranke Radom za boljitaak i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Revizija je preduzeta u skladu sa članom 14. stav (1) Zakona o finansiranju političkih stranaka („Službeni glasnik BiH“ broj: 22/00, 102/09 i 54/10), članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2010. godinu Narodna stranka Radom za boljitaak je iskazala prihod u iznosu od 955.149,01 KM, što je iskazano u narednoj tabeli:

| Red.br. | Vrsta prihoda | Iznos u KM | Učešće u ukupnom prihodu % |
|---------|---------------------------------|-------------------|----------------------------|
| 1 | Članarina | 9.095,00 | 0,95 % |
| 2 | Prilozi fizičkih lica | 257.712,94 | 26,98 % |
| 3 | Prilozi pravnih lica | 1.000,00 | 1,11 % |
| 4 | Prihodi od imovine | 47,08 | 0,10 % |
| 5 | Prihodi od pr. lica | 0,00 | 0,00 % |
| 6 | Prihodi od poklona | 25.045,10 | 2,62 % |
| 7 | Prihodi iz budžeta ¹ | 662.248,89 | 69,33 % |
| | Ukupni prihodi: | 955.149,01 | 100,00 % |

Prema podacima iz godišnjeg finansijskog izvještaja, Narodna stranka Radom za boljitaak je ostvarila rashode u iznosu 827.977,17 KM.

2. PREDSTAVLJANJE POLITIČKE STRANKE

Naziv političke stranke: Narodna stranka Radom za boljitaak. Skraćeni naziv stranke je Za boljitaak.

Stranka je registrirana kod Kantonalnog suda u Sarajevu, Rješenjem broj R 30/01 i dopune rješenja: R-I-8/04 i R-I-5/05 od 28.06.2005. godine, sa sjedištem u Sarajevu, ulica Kranjčevićeva broj 41.

Rješenjem Općinskog suda u Sarajevu broj 065-0-F1-11-000003 od dana 03.06.2011. godine upisana je promjena adrese sjedišta Narodne stranke Radom za boljitaak, prema kojem je sjedište ove političke stranke u Sarajevu, ulica Kulovića broj 1.

¹ Stranka je izvršila korekciju obrazaca finansijskog izvještaja za 2010. godinu (obrazac 3 i 3-f, na kojem su iskazani prihodi koje je stranka ostvarila iz budžeta), te isti dostavila Centralnoj izbornoj komisiji BiH 06.04.2012. godine.

Za zastupanje Narodne stranke Radom za boljitak ovlašten je Mladen Ivanković–Lijanović, predsjednik stranke.

Lice ovlašteno za podnošenje finansijskih izvještaja za 2010. godinu je Ivan Pandža.

Prema podacima iz godišnjeg finansijskog izvještaja za 2010. godinu, organizacionu strukturu Narodne stranke Radom za boljitak čine:

- Središnji ured,
- 10 kantonalnih odbora u Federaciji BiH,
- 6 regionalnih odbora u Republici Srpskoj
- Gradski odbor Mostar,
- Odbor Brčko Distrikt BiH
- 121 općinski odbor.

3. OPIS REVIZIJE

Predmet revizije su godišnji finansijski izvještaj za 2010. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine Narodne stranke Radom za boljitak, i to sljedećih organizacionih dijelova:

- Središnji ured Narodne stranke Radom za boljitak,
- Općinski odbor Narodne stranke Radom za boljitak Široki Brijeg,
- Općinski odbor Narodne stranke Radom za boljitak Livno,
- Općinski odbor Narodne stranke Radom za boljitak Tuzla i
- Općinski odbor Narodne stranke Radom za boljitak Goražde.

Cilj revizije je da se na osnovi provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Narodna stranka Radom za boljitak u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10. Izbornog zakona Bosne i Hercegovine.

Obim revizije finansijskih izvještaja Narodne stranke Radom za boljitak obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica, prihode iz budžeta, kao i finansiranje izborne kampanje u skladu sa poglavljem 15 Izbornog zakona Bosne i Hercegovine.

4. PRETHODNE KONTROLE I REVIZIJE

Služba za reviziju finansiranja političkih stranaka je obavila reviziju i pregled finansijskih izvještaja Narodne stranke Radom za boljitak za period od 2005. do 2009. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama političkoj stranci.

Nakon izvršenog pregleda godišnjeg finansijskog izvještaja za 2009. godinu, izdat je izvještaj o pregledu sa nalazima revizije i preporukom revizora da stranka treba postupati u skladu sa odredbama člana 6. i člana 8. stav (1) Zakona o finansiranju političkih stranaka, odnosno da u

finansijskom izvještaju prijavljuje sve priloge fizičkih lica iznad 100 KM i da se ne finansira iz izvora koji su ovim zakonom zabranjeni političkim strankama.

Nerealizirane preporuke:

Na osnovi uočenih nedostataka u godišnjem finansijskom izvještaju za 2010. godinu, utvrđeno je da Narodna stranka Radom za boljitak nije ispoštovala date preporuke.

5. NALAZI I PREPORUKE

5.1. NALAZI

a) Narodna stranka Radom za boljitak je postupila suprotno odredbama člana 8. stav (1) Zakona o finansiranju političkih stranaka, jer se finansirala iz zabranjenih priloga.²

- (1) Politička stranka, odnosno njenih sedam (7) organizacionih dijelova, je ostvarila prihod iz izvora koji su zabranjeni političkim strankama, na način što je koristila poslovne prostorije koje su u vlasništvu općina, pod povoljnijim uvjetima ili bez plaćanja zakupnine. Na taj način stranka je prekršila odredbe člana 8. stav (1) Zakona o finansiranju političkih stranaka.
- Općinski odbor Narodne stranke Radom za boljitak Ilidža je na osnovi Ugovora o zakupu poslovnih prostorija sa Općinom Ilidža, broj: 05-23-2115/09 od 07.10.2009. godine, koristio poslovni prostor površine 13,00 m². Cijena zakupa je ugovorena u postotku 10% od početne cijene zakupa od 20,00 KM za extra zonu, u kojoj se poslovni prostor nalazi, odnosno u iznosu od 2,00 KM po m² uvećanoj za porez na dodanu vrijednost. Korištenjem poslovnog prostora u 2010. godini, po cijeni zakupnine ispod tržišne cijene, stranka je ostvarila prilog Općine Ilidža u iznosu od od 2.808,00 KM.
- Općinski odbor Narodne stranke Radom za boljitak Tuzla je na osnovi Ugovora o zakupu poslovnih prostorija broj: 02-14-773 od 23.08.2006. godine, koristio poslovni prostor površine 68,67 m² po cijeni zakupa od 1,00 KM po m². Prema Odluci o davanju u zakup općinskih poslovnih zgrada, poslovnih prostorija i garaža ("Službeni glasnik Općine Tuzla", broj 6/04), najniža cijena zakupnine u II zoni Općine Tuzla, gdje se nalaze prostorije koje koristi stranka, iznosi 8,00 KM po m². Korištenjem poslovnog prostora u periodu od januara do decembra 2010. godine pod povoljnijim uvjetima, odnosno nižoj cijeni od one koja je propisana pomenutom odlukom, Narodna stranka Radom za boljitak je ostvarila prilog Općine Tuzla u iznosu od 5.768,00 KM.
- Općinskom odboru Narodne stranke Radom za boljitak Bihać je na osnovi Zaključka Općinskog vijeća Općine Bihać, a u skladu sa Odlukom o izmjeni i dopuni odluke o davanju u zakup poslovnih prostorija („Službeni glasnik Općine Bihać“ broj 2/2003), općina dodijelila na korištenje poslovni prostor površine 28,32 m² uz cijenu zakupa od 1,00 KM uvećanu za 20% i PDV od 17%, što ukupno iznosi 1,41 KM/m². Prema Odluci o davanju u zakup poslovnih prostorija („Službeni glasnik Općine Bihać“ broj 4/2002), cijena zakupa u I građevinskoj zoni, kojoj pripada ulica Bihaćkih branilaca, u istoj se nalazi i prostor koji koristi politička stranka, iznosi 10,00 KM/m².

² U skladu sa odredbom iz člana 8. stav (1) Zakona o finansiranju političkih stranaka, državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

Korištenjem poslovnih prostorija pod povoljnijim uvjetima, u odnosu na tržišne, stranka je ostvarila prilog od Općine Bihać u iznosu od 2.990,60 KM.

- Općinski odbor Narodne stranke Radom za boljitak Ilijaš je na osnovi ugovora o davanju na korištenje poslovnih prostorija broj: 04/3-14-1043/09 od 09.09.2009. godine, koristio bez naknade poslovni prostor površine 14,40 m² u vlasništvu Općine Ilijaš. Obzirom da u skladu sa Odlukom o načinu i visini plaćanja zakupnine poslovnih prostora na području općine Ilijaš ("Službene novine Kantona Sarajevo", broj 2/00) najniži iznos mjesečne zakupnine na području ove općine iznosi 8,00 KM, stranka je ostvarila prilog u iznosu od 1.382,40 KM.
- Općina Goražde je u 2010. godini plaćala zakupninu za poslovni prostor koji je koristila Narodna stranka Radom za boljitak, u mjesečnim iznosima po 150,00 KM, odnosno platila je ukupnu godišnju zakupninu u iznosu od 1.800,00 KM.³
- Općinski odbor Narodne stranke Radom za boljitak Zavidovići je na osnovi Odluke o davanju saglasnosti na korištenje poslovne prostorije u vlasništvu općine Zavidovići broj: 01-23-5716/08 od 30.12.2008. godine, koristio poslovni prostor površine 22,87 m² bez naknade.
- Općinski odbor Narodne stranke Radom za boljitak Breza je bez naknade koristio poslovni prostor površine 15 m², koji je u vlasništvu Općine Breza.

- (2) Stranka je primila priloge od dva fizička lica u iznosima po 4.500,00 KM, što ukupno iznosi 9.000,00 KM, kojima nije moguće utvrditi identitet, pa se pouzdano može tvrditi da su to prilozi od anonimnih donatora⁴.

Uporedbom podataka iz finansijskog izvještaja koji je Narodna stranka Radom za boljitak dostavila Centralnoj izbornoj komisiji BiH sa podacima iz baze podataka Agencije za identifikacione dokumente, evidenciju i razmjenu podataka, utvrđeno je da dva fizička lica, koja je stranka u izvještaju navela, nisu stvarni donatori, jer se lica sa istim ličnim podacima (imenom, prezimenom i jedinstvenim matičnim brojem) nisu nalazila u navedenoj bazi podataka. Također je utvrđeno da te osobe nisu bile upisane u birački spisak za Opće izbore 2010. godine, kod Centralne izborne komisije BiH⁵.

b) Narodna stranka Radom za boljitak nije ispoštovala odredbe člana 11. stavci (1) i (3) Zakona o finansiranju političkih stranaka⁶.

- (1) U poslovnim knjigama i finansijskom izvještaju koji je dostavila Centralnoj izbornoj komisiji BiH, stranka nije iskazala sve prihode i rashode.

³ Na račun stranke uplaćena su sredstva u iznosu od 450,00 KM, a iznos od 1.350,00 KM (9 uplata po 150 KM) uplaćen je na račun NK Berič, sa naznakom da je svrha uplate participacija za plaćanje zakupnine poslovnog prostora koji koristi Narodna stranka Radom za boljitak.

⁴ Donacije su primljene kao gotovinske uplate na balagajnu Narodne stranke Radom za Boljitak.

⁵ Prema podacima Agencije za identifikacione dokumente, evidenciju i razmjenu podataka jedno lice, koje je navedeno kao donator političke stranke, je 07.11.2007. godine proglašeno mrtvim, a drugo lice ima aktivno prebivalište u Mostaru od 02.04.2012. godine

⁶ Prema odredbi člana 11. stav (1) Zakona o finansiranju političkih stranaka, stranka je obavezna uspostaviti potpune i tačne evidencije o svojim prihodima i rashodima.

Prema odredbama člana 11. stav (3) Zakona o finansiranju političkih stranaka, stranka je obavezna podnositi finansijski izvještaj u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja uređeni su Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06)

- Stranka nije iskazala prihode, niti rashode OO Narodne stranke Radom za boljitak Pale. Uvidom u poslovnu dokumentaciju stranke utvrđene su isplate političke stranke za utrošenu električnu energiju po računima ZP „Elektrodistribucija“ a.d. Pale u iznosu od 1.099,14 KM koji su ispostavljeni na Stomatološku ordinaciju, i to u 2010. godini 979,92 KM, a u prethodnoj godini 183,13 KM. Na bazi pomenute dokumentacije, evidentno je da je stranka koristila poslovni prostor, za koji nije platila, niti iskazala zakupninu, a također nije iskazala ni prilog pravnog ili fizičkog lica po tom osnovu.
 - Politička stranka nije iskazala prihod, niti sve troškove koje je ostvario organizacioni dio stranke u Mostaru. Uvidom u poslovnu dokumentaciju stranke utvrđeno je da je ista tokom 2010. godine vršila isplate po osnovu računa koje joj je ispostavilo pravno lice „Velmos Company“ d.d. Mostar, na ime refundacija troškova u iznosu od 7.629,86 KM. Na osnovi pomenutih računa, pouzdano se može tvrditi da je politička stranka u Mostaru koristila poslovni prostor, a pri tome u poslovnim knjigama i finansijskom izvještaju nije iskazala troškove zakupnine, obavezu po tom osnovu, niti pak prilog pravnog lica ostvaren korištenjem prostora bez plaćanja zakupnine.
- (2) U poslovnim knjigama i finansijskom izvještaju koji je dostavila Centralnoj izbornoj komisiji BiH, Narodna stranka Radom za boljitak je iskazala obaveze prema inostranom pravnom licu “Capelant International Corporation” Republic of Seychelles u iznosu od 27.010,87 KM, odnosno 13.810,18 EUR-a, za koje je u postupku revizije utvrđeno da su iste nepostojeće. Uvidom u poslovnu dokumentaciju stranke, utvrđeno je da Račun ino dobavljača “Capelant International Corporation” Republic of Seychelles, broj 043-09 od dana 24.08.2009. godine ispostavljen na iznos 20.715,00 EUR, što u protuvrijednosti domaće valute iznosi 40.515,01 KM. Na osnovi dokumentacije carinske ispostave BiH (JCI broj 19387 od 22.09.2009. godine) i Međunarodnog tovarnog lista (CMR broj 172057 od 22.09.2009. godine) utvrđena je vrijednost isporučene robe u iznosu naznačenom na računu dobavljača, te je na isti obračunata carinska i porezna obaveza. Revizijom je utvrđeno da je stranka evidenciju o nabavci propagandnog materijala u 2009. godini uspostavila na osnovi ugovora koji je glasio na iznos od 34.525,44 EUR, što je više za 13.810,18 EUR, odnosno 27.010,87 KM, od vrijednosti isporučenog materijala, a da naknadno nije izvršeno usaglašavanje sa stvarnom obavezom koju je stranka i platila. Samim time stranka je iskazala i troškove u većem iznosu za 27.010,87 KM od stvarnih.
- (3) Iz poslovnih knjiga stranka nije isknjižila nenaplativa potraživanja u iznosu od 67.300,00 KM, za koja se pouzdano zna da neće biti naplaćena, te je na taj način izbjegla da iskaže troškove u pomenutom iznosu.
- U poslovnim knjigama stranka je iskazala potraživanje od Bošnjačke stranke prava u iznosu od 10.000,00 KM. Uvidom u službene evidencije Centralne izborne komisije BiH i dokumentaciju koju su dostavili nadležni sudovi koji vrše registraciju političkih stranaka, utvrđeno je da Bošnjačka stranka prava, od koje Narodna stranka Radom za boljitak iskazuje potraživanja, ne postoji.
 - Stranka je u poslovnim knjigama za 2010. godinu iskazala potraživanja u iznosu od 57.330,00 KM, na ime isplaćenih sredstava fizičkim licima u 2006. godini, po osnovu ugovora za ostvarenje mjerljivih ciljeva vezanih za izborne rezultate na Općim izborima u toj godini. Kako ne postoje ni minimalni uvjeti za naplatu pomenutih potraživanja, ista su trebala biti isknjižena iz poslovnih knjiga, na teret troškova stranke.

Troškovi izborne kampanje

Narodna stranka Radom za boljitak je postupila u skladu sa odredbama člana 15.10 Izbornog zakona Bosne i Hercegovine, odnosno ispoštovala je zakonom propisani limit na troškove izborne kampanje. U svrhu izborne kampanje stranka je potrošila 331.889,91 KM. Prema odredbama člana 15.10 Izbornog zakona Bosne i Hercegovine, politička stranka za potrebe izborne kampanje ne smije potrošiti više od 0,30 odnosno 0,20 KM po biraču u svakom izbornom krugu⁷, prema broju birača, koje je objavila Centralna izborna komisija BiH. Prema podacima Centralne izborne komisije BiH, Radom za boljitak je u svrhu izborne kampanje mogla potrošiti 2.804.342,80 KM.

5.2. PREPORUKE

Preporučuje se Narodnoj stranci Radom za boljitak da se pridržava odredaba Zakona o finansiranju političkih stranaka, a posebno na osnovi uočenih nedostataka se preporučuje:

- *da se ne finansira iz izvora koji su članom 8. stav (1) Zakona o finansiranju političkih stranaka zabranjeni,*
- *da u skladu sa odredbom člana 11. stav (1) ovog Zakona uspostavi potpune, tačne i blagovremene evidencije o svim prihodima i rashodima,*
- *da finansijske izvještaje podnosi Centralnoj izornoj komisiji Bosne i Hercegovine u skladu sa odredbama člana 11. stav (3) Zakona, odnosno u formi propisanoj Pravilnikom o godišnjim finansijskim izvještajima političkih stranaka i*
- *da utvrdi stvarne obaveze i potraživanja stranke, te izvrši odgovarajuća knjiženja u svojim poslovnim knjigama.*

KOMENTAR:

Narodna stranka Radom za boljitak se u datom roku nije izjasnila na nalaze revizije navedene u Preliminarnom izvještaju o reviziji godišnjeg finansijskog izvještaja za 2010. godinu, koji je stranci dostavljen dana 18.04.2012. godine.

Zahvaljujemo ovlaštenom licu za finansijske izvještaje i osoblju centralnog ureda Narodne stranke Radom za boljitak, za dobru i korektnu saradnju tokom obavljanja revizije finansijskih izvještaja.

Mr. Hasida Gušić – šefica Službe za reviziju; revizorica

Sanja Čabrilo – revizorica

⁷ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava na način što se broj birača u svim izbornim jedinicama, u kojima politički subjekt ima kandidatsku listu ili kandidata, pomnoži sa: 30 feninga za načelnika općine odnosno gradonačelnika i za članove skupštine općine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.